

白氏文集卷第二十九

律詩

凡四十七首


詠興五首

并序

七年四月予罷河南府歸履道第廬舍自給衣儲自充無欲無營或歌或舞頽然自適蓋河洛間一幸人也遇興發詠偶成五章各以首句命為題目

解印出公府

解印出公府抖擻塵土衣百吏放爾散雙鶴隨我歸
歸來履道宅下馬入柴扉馬嘶返舊櫪鶴舞還故池
雞犬何忻忻鄰里亦依依年顏老去日生計勝前時
有帛禦冬寒有穀防歲飢飽於東方朔樂於榮啓期
人生且如此此外吾不知



出府歸吾廬

出府歸吾廬靜然安且逸更無客干謁時有僧問疾
家僮十餘人櫪馬三四匹慵發經旬卧與來連日出
出遊愛何處嵩碧伊瑟瑟况有清和天正當踈散日
身閒自為貴何必居榮秩心足即非貧豈唯金滿室
吾觀權勢者苦以身徇物炙手外炎炎履冰中慄慄
朝飢口忘味夕惕心憂失但有富貴名而無富貴實
池上有小舟

池上有小舟舟中有胡床床前有新酒獨酌還獨嘗
薰若春日氣皎如秋水光可洗機巧心可蕩塵垢腸
岸曲舟行遲一曲進一觴未知幾曲醉醉入無何鄉
寅緣潭島間水竹深青蒼身閒心無事白日為我長

我若未忘世雖閒心亦忙世若未忘我雖退身難藏
我今異於是身世交相忘

四月池水滿

四月池水滿龜游魚躍出吾亦愛吾池池邊開一室
人魚雖異族其樂歸於一旦與爾為徒逍遙同過日
亦無羨滄海蒲藻可委質吾亦忘青雲衡茅足容膝
况吾與爾輩本非蛟龍疋假如雲雨來祇是池中物

小庭亦有月

小庭亦有月小院亦有花可憐好風景不解嫌貧家
菱角執笙簧谷兒抹琵琶紅綃信手舞紫綃隨意歌
菱谷紫紅皆小菡萏名也村歌與社舞客哂主人誇但聞樂不樂
豈在鐘鼓多客告暮將歸主稱日未斜請客稍深酌

願見朱顏酡客知主意厚分數隨後加堂上燭未垂
座中冠已栽左顧短紅袖右命小青娥長跪謝貴客
蓬門勞見過客散有餘興醉卧獨吟哦幕天而席地
誰奈劉伶何

秋涼閒卧

殘暑晝猶長早涼秋尚嫩露荷散清香風竹含疎韻
幽閒竟日卧衰病無人問薄暮宅門前槐花深一寸
酬思黯相公見過弊居戲贈

軒盖光照地行人為徘徊呼傳君子出乃是故人來
訪我入窮巷引君登小臺臺前多竹樹池上無塵埃
貧家何所有新酒三兩盃款曲語上馬從容復遲迴
留守不外宿日斜官漏催但留金刀贈未接玉山頽
家醞不敢惜待君來即開村妓不辭出恐君蹶然哈

再授賓客分司

優穩四皓官清崇三品列伊予再塵忝內愧非
俸錢七八萬給受無虛月分命在東司又不勞朝謁
既資閒養疾亦賴慵藏拙賓友得從容琴觴恣怡悅
乘籃城中去繫馬花前歇六遊金谷春五看龍門雪
吾若默無語安知吾快活吾欲更盡言復恐人豪奪
應為時所笑古惜分司闕但問適意無豈論官冷熱

把酒

把酒仰天問古今誰不死所貴未死間少憂多歡喜
窮通諒在天憂喜即由己是故達道人去彼而取此
勿言未富貴父豢居祿仕借問宗族間幾人拖金紫

勿憂漸衰老且喜加年紀試數班行中幾人及暮齒
朝食不過飽五鼎徒爲爾夕寢止求安一衾而已矣
此外皆長物於我雲相似有子不留金何況兼無子

首夏

林靜蚊未生池靜蛙未鳴景長天氣好竟日和且清
春禽餘哢在夏木新陰成兀爾水邊坐脩橋上行
自問一何適身閒官不輕料錢隨月用生計逐日營
食飽慙伯夷酒足愧淵明陶潛詩云飲酒常不足壽倍顏氏子
富百黔婁生有一即爲樂况吾四者并所以私自慰
雖老有心情

代鶴

我本海上鶴偶逢江南客感君一顧恩同來洛陽陌

洛陽寡族類皎皎唯兩翼貌是天與高色非日浴白
主人誠可戀其奈軒庭窄飲啄雜雞群年深損標格
故鄉渺何處雲水重重隔誰念深籠中七換摩天翮

立秋夕有懷夢得

露簾簌竹青風扇蒲葵輕一與故人別再見新蟬鳴
是夕涼颺起閒境入幽情迴燈見棲鶴隔竹聞吹笙
夜茶一兩杓秋吟三數聲所思渺千里雲水長洲城

哭崔常侍晦叔

頑賤一奉石精珍百鍊金名價既相遠交分何其深
中誠一以合外物不能侵逶迤二十年與世同浮沉
晚有退閒約白首歸雲林垂老忽相失悲哉口語心
春日嵩高陽秋夜清洛陰丘園共誰卜山水共誰尋

風月共誰賞，詩篇共誰吟。花開共誰看，酒熟共誰斟。
惠死莊杜口，鍾歿師廢琴。道理使之然，從古非獨今。
吾道自此孤，我情安可任。唯將病眼淚，一灑秋風襟。

新秋曉興

濁暑忽已退，清宵未全長。晨缸耿殘焰，宿閣凝微香。
啜啜雞下樹，輝輝日上梁。枕低茵席軟，卧穩身入牀。
睡足景猶早起，初風乍凉。展張小屏障，收拾生衣裳。
還有惆悵事，遲遲未能忘。拂鏡梳白髮，可憐冰照霜。

秋日與張賓客舒著作同遊龍門醉中狂歌

凡二百三十八字

秋天高高秋光清，秋風嫋嫋秋蟲鳴。嵩峯餘霞錦綺
卷，伊水細浪鱗甲生。洛陽閒客知無數，少出遊山多

在城商嶺老人自追逐蓬丘逸士相逢迎。南出鼎門
十八里，庄店邈迤橋道平。不寒不熱好時節，鞍馬穩
快衣衫輕。並轡踟躕下西岸，扣舷容與遶中汀。開懷
曠達無所繫，觸目勝絕不可名。荷衰欲黃，荇猶綠。魚
樂自躍，鷗不驚。翠藻蔓長，孔雀尾彩。舩櫓急寒，鴈聲
家醞一壺白，王液野花數把黃。金英晝遊四看西，日
暮夜話三及東方明。暫停盃觴，輟吟詠。我有狂言君
試聽，丈夫一生有二志。兼濟獨善，難得并不能救療。
生民病，即須先濯塵土。纓况吾頭白眼，已暗終日戚。
促何所成，不如展眉開口笑。龍門醉卧香山行。

履信池櫻桃島上醉後走筆送別舒員外兼

寄宗正李卿考功崔郎中

櫻桃島前春去春花萬枝忽憶與宗卿閒飲日又憶
與考功狂醉時歲晚無花空有葉風吹滿地乾重疊
踏葉悲秋復憶春池邊樹下重殷勤今朝一酌臨寒
水此地三迴別故人櫻桃花來春千萬朶來春共誰
花下坐不論崔李上青雲明日舒三亦拋我

秋池獨泛

蕭疎秋竹籬清淺秋風池一隻短舫艇一張斑鹿皮
皮上有野叟手中持酒卮半酣箕踞坐自問身爲誰
巖子重釣日蘇門長嘯時悠然憶自得意外何人知

冬日早起閒詠

水塘耀初旭風竹飄餘霰幽境雖目前不因閒不見
晨起對爐香道經尋兩卷晚坐拂琴塵秋思彈一遍

此外更無事開樽時自勸何必東風來一盃春上面

歲暮

慘澹歲云暮窮陰動經旬霜風裂人面冰雪摧車輪
而我當是時獨不知苦辛晨炊廩有米夕爨厨有薪
夾帽長覆耳重裘寬裹身加之一盃酒煦嫗如陽春
洛城士與庶比屋多飢貧何處爐有火誰家甑無塵
如我飽煖者百人無一人安得不慙愧放歌聊自陳

南池早春有懷

朝遊北橋上晚憇南塘畔西日雪全銷東風冰盡泮
從從魚尾掉瞥瞥鵝毛換泥暖草芽生沙虛泉脉散
晴芳冒苔島宿潤侵蒲岸洛下日初長江南春欲半
時光共拋擲人事堪嗟嘆倚棹忽尋思去年池上伴

古意

脉脉復脉脉美人千里隔不見來幾時瑤草三四碧
玉琴聲悄悄鸞鏡塵暮暮昔爲連理枝今作分飛翮
寄書多不達加飯終無益心腸不自寬衣帶何由窄

山遊示小妓

雙鬟垂未合三十纔過半本是綺羅人今爲山水伴
春泉共揮弄好樹同攀翫笑容花底迷酒思風前亂
紅凝舞袖急黛慘歌聲緩莫唱楊柳枝無腸與君斷

神照禪師同宿

八年三月晦山梨花滿枝龍門水西寺夜與遠公期
晏坐自相對密語誰得知前後際斷處一念不生時

張常侍相訪

西亭晚寂寞鷺散柳陰繁水戶簾不卷風牀席自翻
忽聞車馬客來訪蓬蒿門况是張常侍安得不開樽

早夏遊宴

雖慵興猶在雖老心猶健昨日山水遊今日花酒宴
山榴艷似火玉葉飄如霰榮落逐瞬遷炎涼隨刻變
未收木綿褥已動蒲葵扇且喜物與人年年得相見

感白蓮花

白白芙蓉花本生吳江濱不與紅者雜色類自區分
誰移爾至此姑蘇白使君初來苦顛顛久乃芳氛氤
月月葉換葉年年根生根陳根與故葉銷化成泥塵
化者日已遠來者日復新一爲池中物永別江南春
忽想西涼州中有天寶民埋歿漢父祖孳生胡子孫

已忘鄉土戀豈念君親恩生人尚復爾草木何足云
詠所樂

獸樂在山谷魚樂在陂池蟲樂在深草鳥樂在高枝
所樂雖不同同歸適其宜不以彼易此况論是與非
而我何所樂所樂在分司分司有何樂樂哉人不知
官優有祿料職散無羈縻懶與道相近鈍將閒自隨
昨朝拜表迴今晚行香歸歸來北窓下解巾脫塵衣
冷泉灌我頂暖水濯四肢體中幸無疾卧任清風吹
心中又無事坐任白日移或開書一篇或引酒一卮
但得如今日終身無厭時

思舊

閒日一思舊舊遊如目前再思今何在零落歸下泉
退之服流黃一病訖不痊微之鍊秋石未老身流
杜子得丹訣終日斷腥羶崔君誇藥力經冬不衣綿
或疾或暴天悉不過中年唯予不服食老命反遲延
况在少壯時亦為嗜欲牽但耽葷與血不識汞與鉛
飢來吞熟物渴來飲寒泉詩役五臟神酒汨三丹田
隨日合破壞至今粗完全齒牙未缺落肢體尚輕便
已開第七秩飽食仍安眠且進盃中物其餘皆付天

寄盧少卿

老誨心不亂莊誠形太勞生命既能保死籍亦可逃
嘉肴與旨酒信是腐腸膏艷聲與麗色真為伐性刀
補養在積功如表集衆毛將欲致千里可得老一毫
心不亂形太勞至老一毫皆
出老莊及諸道書仙方禁誠顏回何為者簞瓢纔自

給肥醲不到口年不登三十張蒼何爲者染愛浩無
際妾媵填後房竟壽百餘歲蒼壽有何德回天有何
辜誰謂具聖體不如肥瓠軀遂使世俗心多疑仙道
書寄問盧先生此理當何如

池上清晨候皇甫郎中

曉景麗未熱晨飈鮮且涼池幽綠蘋合霜潔白蓮香
深掃竹間逕靜拂松下牀玉柄鶴翎扇銀鬕雲母
屏除無俗物瞻望唯清光何人擬相訪羸女從蕭郎

詠懷

我知世無幻了無干世意世知我無堪亦無責我事
由茲兩相忘因得長自遂自遂意何如閒官在閒地
閒地唯東都東都少名利閒官是賓客賓客無牽累

嵇康日日懶畢卓時時醉酒肆夜深歸僧房日高睡
形安不勞苦神泰無憂畏從官三十年無如今氣味
鴻雖脫羅弋鶴尚居祿位唯此未忘懷有時猶內愧

北窓三友

今日北窓下自問何所爲欣然得三友三友者爲誰
琴罷輒舉酒酒罷輒吟詩三友遞相引循環無已時
一彈愜中心一詠暢四肢猶恐中有間以醉彌縫之
豈獨吾拙好古人多若斯嗜詩有淵明嗜琴有啓期
嗜酒有伯倫三人皆吾師或乏儋石儲或穿帶索衣
絃歌復觴詠樂道知所歸三師去已遠高風不可追
三友游甚熟無日不相隨左擲白玉卮右拂黃金徽
興酣不覺昏走筆操狂詞誰能持此詞爲我謝親知

縱未以為是豈以我為非

吟四雖雜言

酒酣後歌歇時請君添一酌聽我吟四雖年雖老猶少於常長史命雖薄猶勝於鄭長水眼雖病猶明於徐郎中家雖貧猶富於郭庶子省躬審分何僥倖值酒逢歌且歡喜忘榮知足委天和亦應得盡生生理分司同官中韋長史績年七十餘郭庶子求貧苦最甚徐郎中晦因疾喪明子為河南尹時見同年鄭俞始及長水縣令因歎四子而成此篇也

裴侍中晉公以集賢林亭即事詩二十六韻

見贈猥蒙徵和才拙詞繁輒廣為五百言以伸酬獻

三江路千里五湖天一涯何如集賢第中有平津池

池勝主見覺景新人未知竹森翠琅玕水深洞琉璃水竹以為質質立而文隋文之者何人公來親指麾疏鑿出人意結搆得地宜虛襟一搜索勝槩無遁遺因下張沼汜依高築堦基嵩峯見數片伊水分一支南溪脩且直長波碧逶迤北館壯復麗倒影紅參差東島號晨光泉曜迎朝曦西嶺名夕陽杳曠留落暉前有水心亭動蕩架漣漪後有開闔堂寒溫變天時幽泉鏡泓澄怪石山欹危已上八所各具本名春葩雪漠漠謂杏島夏果珠離離謂櫻桃主人命方舟宛在水中坻親賓次第至酒樂前後施解纜始登汎山遊仍水嬉汭洄無滯礙向背窮幽竒瞥過遠橋下飄旋深澗陞管絃去縹緲羅綺來霏微棹風逐舞迴梁塵隨歌飛宴餘

日云暮醉客未放歸高聲索彩牋大笑催金卮唱和
筆走疾問答盃行遲一詠清兩耳一酣暢四肢主客
忘貴賤不知俱是誰客有詩魔者吟哦不知疲乞公
殘紙墨一掃狂歌詞維云社稷臣赫赫文武姿十授
丞相印五建大將旗四朝致勛業一身冠臯夔去年
才七十決赴懸車期公志不可奪君恩亦難違從容
就中道俛僂來保釐貂蟬雖未脫鸞凰已不羈歷徵
今與古獨步無等夷陸賈功業小二疎官秩卑乘舟
范蠡懽辭穀留侯飢豈若公今日身安家國肥羊祜
在漢南空留峴首碑柳惲庄江南祗賦汀洲詩謝安
入東山但說攜蛾眉山簡醉高陽唯聞倒接羅豈如
公今日餘力兼有之願公壽如山安樂長在茲願我

比蒲稗永得相因依

謝靈運詩云
蒲稗相因依

晚歸香山寺因詠所懷

我年日已老我身日已閒閒出都門望但見水與山
關塞碧巖巖伊流清潺潺中有古精舍軒戶無扃關
岸草歇可藉逕蘿行可攀朝隨浮雲出夕與飛鳥還
吾道本迂拙世途多險艱嘗聞嵇呂輩尤悔生踈頑
巢悟入箕穎皓知返商顏豈唯樂肥遁聊復祛憂患
吾亦從此去終老伊嵩間

瘵

張常侍池涼夜閒讌贈諸公

竹橋新月上水岸涼風至對月五六人管絃三兩事
留連池上酌款曲城外意或嘯或謳吟誰知此閒味
迴看市朝客矻矻趨名利朝忙少遊宴夕困多眠睡

清涼屬吾徒相逢勿辭醉

和皇甫郎中秋曉同登天宮閣言懷六韻

碧天忽已高白日猶未短玲瓏曉樓閣清脆秋絲管
張翰一盃酣嵇康終日懶塵中足憂累雲外多踈散
病木斧斤遺冥鴻羈縲斷逍遙二三子永願爲閒伴

送呂漳州

今朝一壺酒言送漳州牧半自要閒遊愛花憐草綠
花前下鞍馬草上攜絲竹行客飲數盃主人歌一曲
端居惜風景屢出勞僮僕獨醉似無名借君作題目

短歌行

世人求富貴多爲身嗜欲盛衰不自由得失常相逐
君少年日苦學將干祿負笈塵中遊抱書雪前宿
布衾不周體藜茹纔充腹二十登宦途五十被朝服
奴温已挾纊馬肥初食粟未敢議歡遊尚爲名檢束
耳目聾暗後堂上調絲竹牙齒缺落時盤中堆酒肉
彼來此已去外餘中不足少壯與榮華相避如寒燠
青雲去地遠白日終天速從古無奈何短歌聽一曲

詠懷

高人樂丘園中人慕官職一事尚難成兩途安可得
遑遑千世者多苦時命塞亦有愛閒人又爲窮餓逼
我今幸雙遂祿仕兼游息未嘗羨榮華不省勞心力
妻孥與婢僕亦免愁衣食所以吾一家面無憂喜色

府西亭納涼歸

避暑府西亭晚歸有閒思夏淺蟬未多綠槐陰滿地

帶寬衫解領馬穩人攏轡面上有涼風眼前無俗事
路經府門過落日照官次牽聯縲紲囚奔走塵埃吏
低眉悄不語誰復知茲意憶得五年前晚衙時氣味

老熱

一飽百情足一酣萬事休何人不衰老我老心無憂
仕者拘職役農者勞田疇何人不苦熱我熱身自由
卧風北窓下坐月南池頭腦涼脫烏帽足熱濯清流
慵發晝高枕興來夜沉舟何乃有餘適祗緣無過求
或問諸親友樂天是與不亦無別言語多道天悠悠
悠悠君不知此味深且幽但恐君知後亦來從我遊

新秋喜涼因寄兵部楊侍郎

外強火未退中銳金方戰一夕風雨來炎涼隨數變

徐徐炎景度稍稍涼颼扇枕簟忽凄清巾裳亦輕健
老夫納秋候心體殊安便睡足一屈伸搔首摩挲面
寒簾對池竹幽寂如僧院俯觀游魚群仰數浮雲片
閒忙各有趣彼此寧相見昨日聞鷺巢羣對延英殿

懶放二首呈劉夢得吳方之

青衣報平旦呼我起盥櫛今早天氣寒郎君應不出
又無賓客至何以銷閒日已向微陽前暖酒開詩帙

二

朝憐一床日暮愛一爐火床暖日高眠爐温夜深坐
雀羅門懶出鶴髮頭慵裹除却劉與吳何人來問我

○六十六

病知心力減老覺光陰速五十八歸來今年六十六

髮絲千萬白池草八九綠童稚盡成人園林半喬木
看山倚高石引水穿深竹雖有潺湲聲至今聽未足

三適贈道友

褐綾袍厚暖卧蓋行坐披紫氍履寬穩蹇步頗相宜
足適已忘履身適已忘衣况我心又適兼忘是與非
三適今為一怡怡復熙熙禪那不動處混沌未鑿時
此固不可說為君強言之

洛陽春贈劉李二賓客

齊梁格

水南冠蓋地城東桃李園雪銷洛陽堰春入永通門
淑景方靄靄遊人稍喧喧年豐酒漿賤日晏歌吹繁
中有老朝客華髮映朱軒從容三兩人藉草開一樽
樽前春可惜身外事勿論明日期何處杏花遊趙村

洛陽東有趙村杏花千餘樹

寒食

入老何所樂樂在歸鄉國我歸故園來九度逢寒食
故園在何處池館東城側四鄰梨花時二月伊水色
豈獨好風生仍多舊親戚出去恣歡遊歸來聊燕息
有官供祿俸無事勞心力但恐優穩多微躬銷一得

和裴令公一日日一年年雜言見贈

一日日作老翁一年年過春風公心不以貴隔我我
散唯將閒伴公我無才能忝高秩合是人間閒散物
公有功德在生民何因得作自由身前日魏王潭上
宴連夜今日午橋池頭遊拂晨山客硯前吟待月野
人樽前醉送春不敢與公閒中爭第一亦應占得第

二第三人

白氏文集卷第二十九

白氏文集卷第三十

格詩凡四十首

裴侍中晉公出討淮西時過女几山下刻石
 題詩末句云待平賊壘報天子莫指仙山
 示武夫果如所言剋期平賊由是淮蔡迄
 今底寧殆二十年人安生業夫嗟嘆不足
 則詠歌之故居易作詩二百言繼題公之
 篇末欲使採詩者脩史者後之往來觀者
 知公之功德本末前後也

何處盡功業何處題詩篇麒麟高閣上女几小山前
 爾後多少時四朝二十年賊骨化為土賊壘犁為田
 一從賊壘平陳蔡民晏然驟軍成牛戶

蔡寇號驟子
軍陳蔡間農

曉鏡者人畜牛鬼火變人煙生子已嫁娶種桑亦絲
縣皆云公之德欲報無由緣公今在何處守都鎮三
川舊宅留永樂新居開集賢公今在何官被裘珥貂
蟬戰袍破猶在髀肉生欲圓襟懷轉瀟灑氣力彌精
堅登山不拄杖上馬能掉鞭利澤浸入地福降自昇
天昔號天下將今稱地上仙勿追赤松遊勿拍洪崖
肩商山有遺老可以奉周旋

洛陽有愚叟

洛陽有愚叟白黑無分別浪跡雖似狂謀身亦不拙
點檢盤中飯非精亦非糲點檢身上衣無餘亦無關
天時方得所不寒復不熱體氣正調和不飢仍不渴
閒將酒壺出醉向人家歇野食或烹鮮寓眠多擁褐
抱琴榮啓樂荷鋪劉伶達放眼看青山任頭生白髮
不知天地內更得幾年活從此到終身盡爲閒日月

飽食閒坐

紅粒陸渾稻白鱗伊水魴庖童呼我食飯熟魚鮮香
筋筋適我口匙匙充我腸八珍與五鼎無復心思量
捫腹起盥漱下階振衣裳遶亭行數匝却上簷下床
箕裾擁裘坐半身向日暘可憐飽暖味誰肯來同嘗
是歲大和八兵銷時漸康朝廷重經術草澤搜賢良
堯舜求理切夔龍啓沃忙懷才抱智者無不走遑遑
唯此不才叟頑慵戀洛陽飽食不出門閒坐不下堂
子弟多寂寞僮僕少精光衣食雖充給神意不揚揚
爲爾謀則短爲吾謀甚長

閒居自題

門前有流水墻上多高樹竹逕遶荷池紫迴百餘步
波閒戲魚鼈風靜下鷗鷺寂無城市喧渺有江湖趣
吾廬在其上偃卧朝復暮洛下安一居山中亦慵去
時逢過客愛問是誰家住此是白家翁閉門終老處
覽鏡喜老

今朝覽明鏡鬚鬢盡成絲行年六十四安得不衰羸
親屬惜我老相顧興歎咨而我獨微笑此意何人知
咲罷仍命酒掩鏡捋白髭爾輩且安坐從容聽我詞
生若不足戀老亦何足悲生若苟可戀老即生多時
不老即湏天不天即湏衰晚衰勝早天此理決不疑
古人亦有言浮生七十稀我今欠六歲多幸或庶幾
儻得及此限何羨榮啓期當喜不當嘆更傾酒一卮

風雪中作

歲暮風動地夜寒雪連天老夫何處宿煖帳温爐前
兩重褐綺衾一領花叢氈粥熟呼不起日高安穩眠
是時心與身了無閒事牽以此度風雪間居來六年
忽思遠遊客復想早朝士踏凍侵夜行凌寒未明起
心爲身君父身爲心臣子不得身自由皆爲心所使
我心旣知足我身自安止方寸語形骸我應不負爾

對琴酒

西窓明且暖晚坐卷書帷琴匣拂開後酒瓶添滿時
角樽白螺盞玉軫黃金徽未及彈與酌相對已依依
泠泠秋泉韻貯在龍鳳池油油春雲心一杯可致之

自古有琴酒得此味者稀祇應康與籍及我三心知
雪中晏起偶詠所懷兼呈張常侍韋庶子皇

甫郎中雜言

窮陰蒼蒼雪雰雰雪深沒脛泥埋輪東家典錢歸礙
夜南家貫米出凌晨我獨何者無此弊複帳重衾暖
若春怕寒放懶不肯動日高睡足方頻伸瓶中有酒
爐有炭甕中有飯庖有薪奴温婢飽身晏起致茲快
活良有因上無臯陶伯益廊廟材的不能匡君輔國
活生民下無巢父許由箕穎操又不能食薇飲水自
苦辛君不見南山悠悠多白雲又不見西京浩浩唯
紅塵紅塵鬧熱白雲冷好於冷熱中間安置身三年
微倖忝洛尹兩任優穩爲商賈非賢非愚非智慧不
貴不富不賤六冉冉老去過六十騰騰閒來經七春
不知張韋與皇甫私喚我作何如人

和裴侍中南園靜興見示

池官清且幽高懷亦如此有時簾動風盡日橋照水
靜將鶴爲伴閒與雲相似何必學留侯崎嶇覓松子
春寒
今朝春氣寒自問何所欲酥煖薤白酒乳和地黃粥
豈唯厭饒口亦可調病腹助酌有枯魚佐殮兼旨蓄
省躬念前哲醉飽多慙忸君不聞靖節先生樽長空
廣文先生飯不足

菩提寺上方晚望香山寺寄舒員外

晚登西寶刹晴望東精舍反照轉樓臺輝輝似圖畫

冰浮水明滅雪壓松偃亞石閣僧上來雲汀鴈飛下
西京鬧於市東洛間如社曾憶舊遊無香山明月夜
二月一日作贈韋七庶子

園杏紅萼折庭蘭紫芽出不覺春已深今朝二月一
去冬病瘡痂將養遵醫術今春入道場清淨依僧律
嘗聞聖賢語所慎齋與疾遂使愛酒人停盃一百日
明朝二月二疾平齋復畢應須挈一壺尋花覓韋七

犬鷲

晚來天氣好散步中門前門前何所有偶覩犬與鷲
鷲飽凌風飛犬暖向日眠腹舒穩貼地翅疑去聲高摩
天上無羅弋憂下無羈鎖牽見彼物遂性我亦心適
然心適復何爲一詠逍遙篇此仍著於適尚未能忘

言

夢劉二十八因詩問之

昨夜夢夢得初覺思踟躕忽忘來汝那猶疑在吳都
吳都三千里汝郡二百餘非夢亦不見近與遠何殊
尚能齊近遠焉用論榮枯但問寢與食近日兩何如
病後能吟否春來曾醉無樓臺與風景汝又何如蘇
相思一相報勿復慵爲書

閒吟

貧窮汲汲求衣食富貴營營役心力人生不富即貧
窮光陰易過閒難得我今幸在窮富間雖在朝廷不
入山看雪尋花翫風月洛陽城裏七年閒

西行

衣裘不單薄車馬不羸弱藹藹三月天閒行亦不惡
壽安流水館硤石青山郭官道柳陰陰行宮花漠漠
常聞俗間語有錢在處樂我雖非富人亦不苦寂寞
家僮解絃管騎從攜盃杓時向春風前歇鞍開一酌

東歸

翩翩平肩輿中有醉老夫膝上展詩卷竿頭懸酒壺
食宿無定程僕馬多緩驅臨水歇半日望山傾一盃
藉草坐嵬峩並上聲攀花行踟躕風將景共暖體與心
同舒始悟有營者居家如在途方知無繫者在道如
安居前夕宿三堂三堂在號今日游申湖申湖在陝殘春三百
里送我歸東都

途中作

早起上肩輿一盃平旦醉晚憇下肩昇一覺殘春睡
身不經營物心不思量事但恐綺與里只如吾氣味

小臺

新樹低如帳小臺平似掌六尺白藤床一莖青竹杖
風飄竹皮落苔印鶴迹上幽境與誰同閒人自來往

睡後茶興憶楊同州

昨晚飲太多嵬峩並上聲連宵醉今朝食又飽爛熯移
時睡睡足摩挲眼眼前無一事信脚遶池行偶然得
幽致婆娑綠陰樹斑駁青苔地此處置繩牀傍邊洗
茶器白瓷甌甚潔紅爐炭方熾沫下麴塵香花浮魚
眼沸盛來有佳色嚙罷餘芳氣不見楊墓巢誰人知
此味

題文集櫃

破栢作書櫃櫃牢栢復堅收貯誰家集題云白樂天
我生業文字自幼及老年前有七十卷小大二千篇
誠知終散失未忍遽棄捐自開自鎖閉置在書帷前
身是鄧伯道世無王仲宣只應分付女留與外孫傳

旱熱二首

彤雲散不雨赫日吁可畏端坐猶揮汗出門豈容易
忽思公府內青衫折腰吏復想驛路中紅塵走馬使
征夫更辛苦逐客彌顛顛日入尚趨程宵分不遑寐
安知北窓叟偃卧風颯至簟拂碧龍鱗扇搖白鶴翅
豈唯身所得兼示心無事誰言苦熱天元有清涼地

二

勃勃旱塵氣炎炎赤日光飛禽颺將墜行人渴欲狂
壯者不耐飢飢火燒其腸肥者不禁熱喘急汗如漿
此時方自悟老瘦亦何妨肉輕足健逸髮少頭清涼
薄食不飢渴端居省衣裳數匙梁飯冷一領綃衫香
持此聊過日焉知畏景長

偶作二首

戰馬春放歸農牛冬歇息何獨徇名人終身役心力
來者殊未已去者不知還我今悟已晚六十方退閒
猶勝不悟者老死紅塵間

二

名無高與卑未得多健羨事無小與大已得多厭賤
如此常自苦反此或自安此理知甚易此道行甚難

勿信人虛語君當事上看

池上作

西溪南潭皆池中勝處也

西溪風生竹森森南潭萍開水沉沉叢翠萬竿湘岸色空碧一泊松江心浦派縈迴誤遠近橋島向背迷窺臨澄瀾方丈若萬頃倒影咫尺如千尋泛然獨遊逸然坐坐念行心思古今菟裘不聞有泉沼西河亦恐無雲林豈如白翁退老地樹高竹密池塘深華亭雙鶴白矯矯太湖四石青岑岑眼前盡日更無客膝上此時唯有琴洛陽冠蓋自相索誰肯來此同抽簪

何處堪避暑

何處堪避暑林間昔日樓何處好追涼池上隨風舟日高飢始食食竟飽還遊遊罷睡一覺覺來茶一甌

眼明元青山耳醒聞碧流脫襪閒濯足解巾快搔頭如此來幾時已過六七秋從心至百骸無一不自由拙退是其分榮耀非所求雖被世間笑終無身外憂此語君莫怪靜思吾亦愁如何三伏月楊尹謫虔州

詔下

昨日詔下去罪人今日詔下得賢臣進退者誰非我事世間寵辱常紛紛我心與世兩相忘時事雖聞如不聞但喜今年飽飯喫洛陽禾稼如秋雲更傾一樽歌一曲不獨忘世兼忘身

七月一日作

七月一日天秋生履道里間居見清景高興從此始林間暑雨歇池上涼風起橋竹碧鮮鮮岸莎青靡靡

蒼然古磐石清淺平流水何言中門前便是深山裡
雙僮侍坐臥一杖扶行止飢聞麻粥香渴覺雲湯美
想麻粥平生所好物今日多在此此外更何思市朝
雲母湯心已矣

開襟

開襟何處好竹下池邊地餘熱體猶煩早涼風有味
黃萎槐葢結紅破蓮芳墜無奈每年秋先來入衰思

自賓客遷太子少傅分司

頭上漸無髮耳間新有毫形容逐日老官秩隨年高
優饒又加俸閒穩仍分曹飲食免藜藿居處非蓬蒿
何言家尚貧銀榼提綠醪勿謂身未貴金章照紫袍
誠合知止足豈宜更貪饕默然心自問於國有何勞

自在

杲杲冬日光明暖真可愛移榻向陽坐擁裘仍解帶
小奴搥我足小婢搥我背自問我為誰胡然獨安泰
安泰良有以與君論梗槩心了事未了飢寒迫於外
事了心未了念慮煎於內我今實多幸事與心和會
內外及中間了然無一礙所以日陽中向君言自在

詠史九年十一月作

秦磨利刀斬李斯齊燒沸鼎烹酈其可憐黃綺入商
洛閒臥白雲歌紫芝彼為菹醢机上盡此作鸞鳳天
外飛去者逍遙來者死乃知禍福非天為

因夢有悟

交友淪歿盡悠悠勞夢思平生所厚者昨夜夢見之

夢中幾許事枕上無多時款曲數盃酒從容一局碁
碁酒皆夢中所見事初見韋尚書弘景金紫何輝輝中遇李侍郎
亮笑言甚怡怡終為崔常侍亮意色苦依依一夕三
改變夢心不驚疑此事人盡怪此理誰得知我粗知
此理聞於竺乾師識行安分別智隱迷是非若轉識
為智菩提其庶幾

春遊

上馬臨出門出門復逡巡迴頭問妻子應怪春遊頻
誠知春遊頻其奈老大身朱顏去復去白髮新更新
請君屈十指為我數交親大限年百歲幾人及七旬
我今六十五走若下坂輪假使得七十祇有五度春
逢春不遊樂但恐是癡人

題天竺南院贈闍元旻清四上人

雜芳間草合繁綠巖樹新山深景候晚四月有餘春
竹寺過微雨石逕無纖塵白衣一居士方袍四道人
地是佛國土人非俗交親城中山下別相送亦殷勤

哭師臯

南康丹旆引魂迴洛陽籃舁送葬來北邙原邊草樹
畔月苦烟愁夜過半妻孥兄弟號一聲十二人腸一
時斷往者何人送者誰樂天哭別師臯時平生分義
向人盡今日哀冤唯我知我知何益徒垂淚籃輦迴
辛馬迴轡何日重聞掃市歌誰家收得琵琶妓師臯醉後
善歌掃市詞又有小妓攻琵琶不知今落在何處蕭蕭風樹白楊影蒼蒼露
草青蒿氣更就墳邊哭一聲與君此別終天地

隱几贈客

宦情本淡薄年貌又老醜紫綬與金章於子亦何有
有時獨隱几峇音塔然無所偶卧枕一卷書起嘗一盃
酒書將引昏睡酒用扶衰朽客到忽已酣脫巾坐搔
首踈頑倚老病容恕慙交友忽思莊生言亦擬鞭其
後

夏日作

葛衣踈且單紗帽輕復寬一衣與一帽可以過炎天
止於便吾體何必被羅紈宿雨林笋嫩晨露園葵鮮
烹葵炮嫩笋可以備朝食止於適吾口何必飲腥羶
飯訖盥漱已捫腹方果然婆娑庭前步安穩窓下眠
外養物不費內歸心不煩不費用難盡不煩神易安
庶幾無天闕得以終天年

晚涼偶詠

日下西墻西風來北窓北中有逐涼人單牀獨棲自
飄蕭過雲雨搖曳歸飛翼新葉多好陰初筠有佳色
幽深小池館優穩閒官職不愛勿復論愛亦不易得
酬牛相公宮城早秋寓言見示兼呈夢得時

得有疾

七月中氣後金與火交爭一聞白雪唱暑退清風生
碧樹未搖落寒蟬始悲鳴夜涼枕簟滑秋燥衣巾輕
踈受老慵出劉楨疾未平何人伴公醉新月上宮城
小臺晚坐憶夢得

汲泉灑小臺臺上無纖埃解帶面西坐輕襟隨風開

晚涼閒興動憶同傾一盃月明候柴戶藜杖何時來
種桃歌

食桃種其核一年核生芽二年長枝葉三年桃有花
憶昨五六歲灼灼盛芬華迨茲八九載有減而無加
去春已稀少今春漸無多明年後年後芳意當如何
命酒樹下飲停盃拾餘葩因桃忽自感悲吒成狂歌
狂言示諸姪

世欺不識字我忝攻文筆世欺不得官我忝居班秩
人老多病苦我今幸無疾人老多憂累我今婚嫁畢
心安不移轉身泰無牽率所以十年來形神閒且逸
况當垂老歲所要無多物一裘煖過冬一飯飽終日
勿言舍宅小不過寢一室何用鞍馬多不能騎兩匹

如我優幸身人中十有七如我知足心人中百無一
傍觀愚亦見當已賢多失不敢論他人狂言示諸姪
偶以拙詩數首寄呈裴少尹侍郎蒙以盛製
四篇一時酬和重投長句美而謝之

投君之文甚流蕪數篇價直一束芻報我之章何瓊
粲纍纍四貫驪龍珠毛詩三百篇後得文選六十卷
中無一麋麗龜絕報賽鹿連柱難支梧高興獨因
秋日盡清吟多與好風俱銀鈎金錯兩殊重宜上屏
風張陸隅

白氏文集卷第三十

白氏文集卷第三十一

律詩

凡一首

六年冬暮贈崔常侍晦叔

時為河南尹

白氏
原

鬢毛霜一色光景水爭流
易過唯冬日難銷是老愁
香開綠蟻酒煖擁褐綾裘
已共崔君約樽前倒卽休
戲招諸客
黃醅綠醕迎冬熟絳帳紅爐
逐夜開誰道洛中多逸客
不將書喚不曾來

十二月二十三日作兼呈晦叔

案頭曆日雖未盡向後唯殘
六七行牀下酒瓶雖不滿
猶應醉得兩三場病身不許
依年老拙宦虛教逐日忙聞
健偷閒且勤飲一杯之外莫
思量

七年元日對酒五首

慶弔經過嬾逢迎跪拜遲不因時節日豈覺此時衰

二

衆老憂添歲余衰喜入春年開第七秩屈指幾多人

三

三杯藍尾酒一櫟膠牙餠除却崔常侍無人共我爭

四

今朝吳與洛相憶一欣然夢得君知否俱過本命年

余與蘇州劉郎中同壬子歲今年六十二

五

同歲崔何在同年杜又無余與吏部崔相公甲子同歲與循州杜相公及第同

年秋冬二應無藏避處只有且歡娛

七年春題府廳

潦倒守三川因循涉四年推誠廢鉤距示恥用蒲鞭

以此稱公事將何銷俸錢雖非好官職歲久亦妨賢

早春醉吟寄太原令狐相公蘇州劉郎中

雪夜閒遊多秉燭花時暫出亦提壺別來少遇新詩

敵老去難逢舊飲徒大振威名降北虜勤行惠化活

東吳不知歌酒騰騰興得似河南醉尹無

洛下送牛相公出鎮淮南

北闕至東京風光十六程坐移丞相閣春入廣陵城

紅旆擁雙節白鬚無一莖萬人開路看百吏立班迎

閩外君彌重樽前我亦榮何須身自得將相是門生

元和初牛相公應制策登第三等子為翰林考覈官

箏

雲髻飄蕭綠花顏旖旎紅雙眸剪秋水十指剝春葱
楚艷為門閥秦聲是女工甲鳴銀玦璫桂觸玉玲瓏
後苦啼嫌月鸞嬌語詭風移愁來手底送恨入絃中
趙瑟清相似胡琴鬧不同慢彈迴斷鴈急奏轉飛蓬
霜珮鏘還委冰泉咽復通珠聯千拍碎刀截一聲終
倚麗精神定矜能意態融歇時情不斷休去思無窮
燈下青春夜樽前白首翁且聽應得在老耳未多聾

洛中春遊呈諸親友

莫嘆年將暮須憐歲又新府中三遇臘洛下五逢春
春樹花珠顆春塘水翅塵春娃無氣力春馬有精神
詠春遊一
時之態並轡鞭徐動連盤酒慢巡經過舊鄰里

逐好交親笑語銷閒日酬歌送老身一生歡樂事亦
不少於人

酬舒三負外見贈長句

自請假來多少日五旬光景似須臾已判到老為狂
客不分當春作病夫楊柳花飄新白雪櫻桃子綴小
紅珠頭風不敢多飲能酌三分相勸無

將歸一絕

欲去公門返野扉預思泉竹已依依更憐家醞迎春
熟一瓮醞醞待我歸

罷府歸舊居

自此後重授賓
客歸履道宅作

陋巷乘籃入朱門挂印迴腰間拋組綬纓上拂塵埃
屈曲閒池沼無非手自開青蒼好竹樹亦是眼看栽

石片擡琴匣松枝閣酒杯此生終老處昨日却歸來
睡覺偶吟

官初罷後歸來夜天欲明前睡覺時起坐思量更無
事身心安樂復誰知

問支琴石

疑因星墮空中落嘆被泥埋澗底沉天上定應勝地
上支機未必及支琴提攜拂拭知恩否雖不能言合
有心

自喜

身慵難勉強性拙易遲迴布被辰時起柴門午後開
忙驅能者去閒逐鈍人來自喜誰能會無才勝有才
裴常侍以題薔薇架十八韻見示因廣爲三

十韻以和之

託質依高架攢華對小堂晚開春去後獨秀院中央
霽景朱明早芳時白晝長穠因天與色麗共日爭光
剪碧排千萼研朱染萬房烟條塗石綠粉藥撲雌黃
根動彤雲涌枝搖赤羽翔九微燈炫轉七寶帳熒煌
淑氣熏行徑清陰接步廊照梁迷藻梲耀壁變雕墻
爛若蕞然火殷於葉得霜臙脂含笑臉蘇合裏衣香
浹洽濡晨露玲瓏漏夕陽合羅排勘顛醉暈淺深粧
乍見疑迴面遙看誤斷腸風朝舞飛鷺雨夜泣蕭娘
桃李慙無語芝蘭讓不芳山榴何細碎石竹苦尋常
蕙慘偎欄避蓮羞映浦藏怯教蕉葉戰妬得柳花狂
豈可輕嘲詆應須痛比方畫幀風自展綉繖蓋誰張

翠錦挑成字丹砂印著行猩猩凝血點瑟瑟感金匡
散亂萎紅片尖纖嫩紫芒觸僧飄毳褐留妓冒羅裳
寡和陽春曲多情騎省郎緣誇美顏色引出好文章
東顧辭仁里語曰里仁為美又裴君所居名仁和里西歸入帝鄉假如
君愛殺留著莫移將裴君題詩之次而常侍詔到唱和未竟而輒騎西歸故云

感舊詩卷

夜深吟罷一長吁老淚燈前濕白鬚二十年前舊詩

卷十人酬和九人無

酬李二十侍郎

笋老蘭長花漸稀衰翁相對惜芳菲殘鶯著雨慵休
轉落絮無風凝不飛行掇木芽供野食坐牽蘿蔓挂
朝衣十年分手今同醉醉未如泥莫道歸

和夢得夢得來詩云謾讀圖書四十年年年

空為飽煖家

綸閣沉沉無寵命蘇臺籍籍有能聲豈唯不得清文
刀但恐空傳冗吏名郎署迴翔何水部江湖留滯謝
宣城所嗟非獨君如此自古才難共命爭

贈草堂宗密上人

吾師道與佛相應念念無為法法能口藏宣傳十二
部心臺照耀百千燈盡離文字非中道長住虛空是
小乘少有人知菩薩行世間只是重高僧

喜照密閒實四上人見過

紫袍朝士白髯翁與俗乖疎與道通官秩三迴分洛
下交遊一半在僧中臭帑世界終須出香火因緣久

願同齋後將何克供養西軒泉石北窓風

贈皇甫六張十五李二十三賓客

昨日三川新罷守今年四皓盡分司幸陪散秩間居
日好是登山臨水時家未苦貧常醞酒身雖衰病尚
吟詩龍門泉石香山月早晚同遊報一期

微之敦詩晦叔相次長逝巋然自傷因成二

絕

併失鵷鷺侶空留糜鹿身只因嵩洛下長作獨遊人

二

長夜君先去殘年我幾何秋風滿衫淚泉下故人多

池上閒詠

青莎臺上起書樓綠藻潭中繫釣舟日晚愛行深竹

裏月明多上小橋頭暫嘗新酒還成醉亦出中門便
當遊一部清商聊送老白鬚蕭颯管絃秋

涼風歎

昨夜涼風又颭然螢飄葉墜卧牀前途秋莫嘆須知
分已過潘安三十年

和高僕射罷節度讓尚書授少保分司喜遂

游山水之作

暫辭八座罷雙旌便作登山臨水行能以忠貞酬重
任不將富貴礙高情朱門出去簪纓從絳帳歸來歌
吹迎鞍轡鬧裝光滿馬何人信道是書生

送考功崔郎中赴闕

稱意新官又少年秋涼身健好朝天青雲上了無多

路却要徐驅穩著鞭

重修香山寺畢題二十二韻以紀之

闕塞龍門口，祗園鷲嶺頭。曾隨滅劫壞，今遇勝緣修。
再瑩新金刹，重裝舊石樓。病僧皆引起，忙客亦淹留。
四望窮沙界，孤標出贍洲。地圖銷雜邑，天柱倚松丘。
兩面蒼蒼岼，中心瑟瑟流。波翻八灘雪，堰護一潭油。
臺殿朝彌麗，房廊夜更幽。千花高下塔，一葉往來舟。
岫合雲初吐，林開霧半收。靜聞樵子語，遠聽棹郎謳。
官散殊無事，身閒甚自由。吟來携筆視，宿去抱衾稠。
霽月當窓白，涼風滿簾秋。烟香封藥竈，泉冷洗茶甌。
南祖心應學，西方社可投。先宜知止足，次要悟浮休。
覺路隨方樂，迷塗到老愁。須除愛名障，莫作戀家囚。

便合窮年住，何言竟日遊。可憐終老地，此是我菟裘。

送楊八給事赴常州

無嗟別青瑣，且喜擁朱輪。五十得三品，百千無一人。
須勤念黎庶，莫苦憶交親。此外無過醉，毗陵何限春。

聞歌者唱微之詩

新詩絕筆聲名歇，舊卷生塵篋。筭深時向歌中聞，一
句未容傾耳已傷心。

醉送李二十常侍赴鎮浙東

靖安客舍花枝下，共脫青衫典濁醪。今日洛橋還醉
別，金杯翻汗麒麟袍。喧闐夙駕君脂轄，酪酏離筵我
藉糟。好去商山紫芝伴，珊瑚鞭動馬頭高。

醉別程秀才

五度龍門點額迴却緣多藝復多才貧泥客路粘難
出愁瓊鄉心掣不開何必更遊京國去不如且入醉
鄉來吳絃楚調瀟湘弄爲我殷勤送一杯程主善琴尤能沉湘

自詠

白衣居士紫芝仙半醉行歌半坐禪今日維摩兼飲
酒當時綺季不請錢等閒池上留賓客隨事燈前有
管絃但問此身銷得否分司氣味不論年

把酒思閒事二首

把酒思閒事春愁誰最深乞錢羈客面落第舉人心
月下低眉立燈前抱膝吟憑君勸一醉勝與萬黃金

二

把酒思閒事春嬌何處多試鞍新白馬弄鏡小青娥
掌上初教舞花前欲按歌憑君勸一醉勸了問如何

衰荷

白露凋花花不殘涼風吹葉葉初乾無人解愛蕭條
境更遶衰藜一匝看

池上送考功崔郎中兼別房賈二妓

文昌列宿徵還日洛浦行雲放散時鸚鵡上天花逐
水無因再會白家池

自問

依仁臺廢悲風晚履信池荒宿草春晦叔亭臺在仁微之池館在
信居後自問老身騎馬出洛陽城裏覓何人

送陳許高僕射赴鎮

敦詩閱禮中軍帥重士輕財大丈夫常與師徒同苦
樂不教親故隔榮枯花鈿坐遶黃金印絲竹行隨白
玉壺商皓老狂唯愛醉時時能寄酒錢無

青氈帳二十韻

合聚千羊毳施張百子岑

司馬遷書張空岑

骨盤邊柳健色

染塞藍鮮北製因戎初南移逐虜遷汰風吹不動禦
雨濕彌堅有頂中央聳無隅四嚮圓旁通門豁爾內
密氣溫然遠別關山外初安庭戶前影孤明月夜價
重苦寒年軟暖圍氈毯鎗縱束管絃最宜霜後地偏
稱雪中天側置低歌座平鋪小舞筵聞多揭簾入醉
便擁袍眠鐵檠移燈背銀囊帶火懸深藏曉蘭焰暗
貯宿香烟獸炭休親近狐裘可弃指硯溫融凍墨瓶

煖變春泉蕙帳徒招隱茅菴浪坐禪貧僧應嘆羨寒

士定留連賓客於中接兒孫向後傳王家誇舊物未

及此青氈

王子敬語偷兒青氈我家舊物

荅夢得秋日書懷見寄

幸免非常病甘當本分衰眼昏燈最覺腰瘦帶先知
對菜霜紅日髭鬚雪白時悲愁綠欲老老過却無悲

同諸客題于家公主舊宅

平陽舊宅少人遊應是遊人到卽愁春穀鳥啼桃李
院絡絲蟲怨鳳皇樓臺傾滑石猶殘砌簾斷真珠不
滿鈎聞道至今簫史在髭鬚雪白向明州

荅夢得八月十五日夜翫月見寄

南國碧雲客東京白首翁松江初有月伊水正無風

遠思兩鄉斷清光千里同不知娃館上何侶石樓中
其夜余在龍門石樓上望月

初冬早起寄夢得

起戴烏紗帽行披白布裘爐温先煖酒手冷未梳頭
早起烟霜白初寒鳥雀愁詩成遣誰和還是寄蘇州

秋夜聽高調涼州

樓上金風聲漸緊月中銀字韻初調促張絃柱吹高
管一曲涼州入沈寥

香山寺二絕

空門寂靜老夫閒伴鳥隨雲往復遠家醞滿瓶書滿
架半移生計入香山

二

愛風岩上攀松蓋戀月潭邊坐石稜且共雲泉結綠
境他生當作此山僧

送舒著作重授省郎赴闕

三歲相依在雒都遊花宴月飽歡娛惜別笙歌多恣
咽願留軒蓋少踟躕劍磨光彩依前出鵬舉風雲逐
後駟從此求閒應不得更能重醉白家無

同諸客嘲雪中馬上妓

珊瑚鞭鞞馬踟躕引手低蛾索一盃腰為逆風成弱
柳面因衝冷作凝酥銀篋穩簾烏羅帽花襜宜乘叱
撥駒雪裏君看何所似王昭君妹寫真圖

喜劉蘇州恩賜金紫遙想賀宴以詩慶之

海內姑蘇太守賢恩加章綬豈徒然賀賓喜色欺杯

酒醉妓歡聲遏管絃魚珮葺鱗光照地鶻銜瑞帶勢
冲天莫嫌髮上些些白金紫由來稱長年

藍田劉明府攜酌相過與皇甫郎中卯時同
飲醉後贈之

臘月九日煖寒客卯時十分空腹杯玄晏舞狂烏帽
落藍田醉倒玉山頽貌偷花色老慙去歌踏柳枝春
暗來不爲劉家賢聖物愁翁笑口大難開

劉蘇州以華亭一鶴遠寄以詩謝之

老鶴風姿異衰翁詩思深素毛如我髮丹頂似君心
松際雪相映雞群塵不侵殷勤遠來意一隻重千金
早春憶蘇州寄夢得

吳苑四時風景好就中偏好是春天霞光曙後潑於

火水色晴來嫩侶烟士女笙歌宜月下使君金紫種

花前誠知歡樂堪留戀其奈離鄉已四年

嘗新酒憶晦叔二首

樽裏看無色杯中動有光自君拋我去此物共誰嘗

二

世上強欺弱人間醉勝醒自君拋我去此語更誰聽

負春

病來道士教調氣老去山僧勸坐禪孤負春風楊柳
曲去年斷酒到今年

池上閒吟二首

高臥閒行自在身池邊六見柳條新幸逢堯舜無爲
口得作羲皇向上人四皓再除猶且健三州罷守未

全貧莫愁客到無供給家醞香濃野菜春

二

非庄非宅非蘭若竹對池亭十畝餘非道非僧非俗
夷褐裘烏帽閉門居夢遊信意寧殊蝶心樂身閒便
是魚雖未定知生與死其間勝負兩何如

早春招張賓客

久雨初晴天氣新風烟草對盡欣欣雖當冷落衰殘
日還有陽和暖活身池色溶溶藍染水花光焰焰火
燒春商山老伴相收拾不用隨他年少人

營間事

自笑營間事從朝到日斜澆畦引泉脉掃逕避蘭芽
暖變墻衣色晴催木筆花桃根知酒渴晚送一甌茶

感春

老思不禁春風光照眼新花房紅鳥嘴池浪碧魚鱗
倚棹誰為伴持杯自問身心情多少在六十二三人

春池上戲贈李郎中

滿池春水何人愛唯我迴看指侶君直侶接藍新汁
色與君南宅染羅裙

翫半開花贈皇甫郎中

八年寒食日池東小樓上作

勿訝春來晚無嫌花發遲人憐全盛日我愛半開時
紫蠟粘為蒂紅蘇點作蕤成都新夾禩梁漢碎臙脂
對杪真珠顆墻頭小女兒淺深粧駁落高下火參差
蝶戲爭香孕鶯啼選穩枝好教郎作伴合共酒相隨
醉翫無勝此狂嘲更讓誰猶殘少年興未是老人詩

西日憑輕照東風莫殺吹明朝應爛熳後夜更離披
林下遙相憶樽前暗有期銜杯嚼蘂思唯我與君知
池邊

柳老香絲宛荷新鈿扇圓殘春深對裏斜日小樓前
醉遣收杯杓閒聽理管絃池邊更無事看補採蓮船
家釀新熟每嘗輒醉妻姪等勸令少飲因成

長句以諭之

君應怪我朝朝飲不說向君君不知身上幸無疼痛
處甕頭正是撇嘗時劉妻勸諫夫休醉王姪分踈叔
不癡六十三翁頭雪白假如醒黠欲何爲

送常秀才下第東歸

東歸多旅恨西上少知音寒食看花眼春風落第心

百夏齋前二月一醉直千金到處公卿席無辭酒

且遊

手裏一杯滿心中百事休春應唯仰醉老更不禁愁
弄水迴船尾尋花信馬頭眼看筋力減遊得且須遊

題王家庄臨水柳亭

弱柳綠堤種虛亭壓水開條疑逐風去波欲上階來
翠羽偷魚入紅罾學舞迴春愁正無緒爭不盡殘杯

題令狐家木蘭花

賦如玉指塗朱粉先侶金刀剪紫霞從此時時春夢
裏應添一封女郎花

拜表迴閒遊

玉珮金章紫花綬紵衫藤帶白綸巾晨興拜表稱朝

士晚出遊山作野人達磨傳心令息念玄元留語遣
同塵八關淨戒齋銷自一曲狂歌醉送春酒肆法堂
万丈室其間豈是兩般身

西街渠中種蓮疊石頗有幽致偶題小樓

朱檻低墻上清流小閣前雇人栽菡萏買石造潺湲
影落江心月聲移谷口泉閒看卷簾坐醉聽掩牕眠
路笑淘官米家熬費料錢是非君莫問一對一條然

晚春閒居楊工部寄詩揚常州寄茶同到因

以長句答之

宿醒寂寞眠初起春意闌珊日又斜勸我加餐因早
筵恨人休醉是殘花悶吟工部新來句渴飲毗陵遠
到茶兄弟東西官職冷門前車馬向誰家

玉泉寺南三里澗下多深紅躑躅繁艷殊常

感惜題詩以示遊者

玉泉南澗花奇怪不似花叢似火堆今日多情唯我
到每年無故爲誰開寧辭辛苦行三里更與留連飲
兩杯猶有一般孤負事不將歌舞管絃來

早服雲母散

曉服雲英漱井華寥然身若在烟霞藥銷日晏三匙
飯酒渴春深一碗茶每夜坐禪觀水月有時行醉翫
風花淨名事理人難解身不出家心出家

三月晦日晚聞鳥聲

晚來林鳥語殷勤侶惜風光說向人遣脫破袍勞報
暖催沽美酒敢辭貧聲聲勸醉應須醉一歲唯殘半

日春

早夏遊平原迴

夏早日初長南風草木香肩輿頗平穩澗路甚清涼
紫葢行看採青梅旋摘嘗療飢兼解渴一盞冷雲漿
宿天竺寺迴

野寺經三宿都城復一還家乃念婚嫁身尚繫朝班
瀟灑秋臨水沉吟晚下山長聞猶未得逐日且偷閒
侍中晉公欲到東洛先蒙書問期宿龍門思

往感今輒獻長句

音蒙興化池頭送大和三年春居易授賓客分司東
來時蒙侍中於興化里池上宴送
今許龍門潭上期聚散但慙長見念榮枯安敢道相
思功成名遂來雖久雲臥山遊去未遲聞說風情節

力在只如初破蔡州時

奉和晉公侍中蒙除留守行及洛師感悅發

中裴然成詠

鸞鳳翱翔在寥廓貂蟬瀟灑出塵埃致成堯舜昇平
代收得夔龍強健身拋擲功名還史冊分張歡樂與
交親商山老皓雖休去終是畱侯門下人

送劉五司馬赴任碭州兼寄崔使君

位下才高多怨天劉兄道勝獨恬然貧於揚子兩三
倍老過榮公六七年筆硯莫拋留壓案簞瓢從陋也
銷錢郡丞自合當優禮何況夷陵太守賢

菩提寺上方晚眺

樓閣高低對淺深山光水色暝沉沉嵩烟半卷青綃

幕伊浪平鋪綠綺衾飛鳥滅時宜極目遠風來處好
開襟誰知不離簪纓內長得逍遙自在心

楊柳枝詞八首

六么水調家家唱白雪梅花處處吹古歌舊曲君休
聽聽取新翻楊柳枝

二

陶令門前四五對亞夫營裏百千條何侶東都正二
月黃金枝映洛陽橋

三

依依嫋嫋復青青勾引春風無限情白雪花繁空撲
地綠絲條弱不勝鶯

四

紅板江橋青酒旗館娃宮暖日斜時可憐雨歇東風
定萬對千條各自垂

五

蘇州楊柳任君誇更有錢塘勝館娃若解多情尋小
小綠楊深處是蘇家

六

蘇家小女舊知名楊柳風前別有情剝條盤作銀環
樣卷葉吹爲玉笛聲

七

菜含濃露如啼眼枝嫋輕風似舞腰小對不禁攀折
苦乞君留取兩三條

八

人言柳葉似愁眉更有愁腸似柳絲柳絲挽斷腸牽
斷彼此應無續得期

浪淘沙詞六首

一泊沙來一泊去一重浪滅一重生相攪相淘無歇
日會教山海一時平

二

白浪茫茫與海連平沙浩浩四無邊暮去朝來淘不
住遂令東海變桑田

三

青草湖中萬里程黃梅雨裏一人行愁見灘頭夜泊
處風翻暗浪打船聲

四

借問江潮與海水何似君情與妾心相恨不如潮有
信相思始覺海非深

五

海底飛塵終日有山頭化石豈無時誰道小郎拋小
婦船頭一去沒迴期

六

隨波逐浪到天涯遷客生還有幾家却到帝鄉重富
貴請君莫忘浪淘沙

白氏文集卷三十一

白氏文集第三十二

律詩凡八十二首

讀老子

言者不如知者默此語吾聞於老君若道老君是知者緣何自著五千文

讀莊子

莊生齊物同歸一我道同中有不同遂性逍遙雖一
致鸞凰終校勝蛇虫

讀禪經

須知諸相皆非相若任無餘却有餘言下忘言一時
了夢中說夢兩重虛空花豈得兼求果物焰如何更
覓魚攝動是禪禪是動不禪不動即如如

感興二首

吉凶禍福有來由但要深知不要憂只見火光燒潤
屋不聞風浪覆虛舟名為公器無多取利是身災合
少求雖異匏瓜難不食大都食足早宜休

三

魚能深入寧憂釣鳥解高飛豈觸羅執處先爭炙手
去悔時其奈噬臍何樽前誘得猩猩血幕上偷安鷺
鷺巢我有一言君記取世間自取苦人多

問鶴

烏鷲爭食雀爭窠獨立池邊風雪多盡日踏冰翹一
足不鳴不動意如何

代鶴

鷹攫雞雞助新鷗拳鷺鴈鴈頭坐何如斂翅不
立飛上雲松棲穩枝

閒卧有所思二首

向夕褰簾臥枕琴微涼入戶起開襟偶因明月清風
夜忽想遷臣逐客心何投荒初恐懼誰人逸澤正
悲吟始知洛下分司坐一日安閒直萬金

二

權門要路是身災散地閒居少禍胎今日憐君嶺南
去當時笑我洛中來重全性命緣無毒木盡天年為
不才大抵吉凶多自致李斯一去二疎迴

喜聞

瀟洒伊嵩下優游黃綺間未曾一日悶已得六年閒

魚鳥爲徒侶烟霞是往還
伴僧禪閉目迎客笑開顏
興發宵遊寺慵時晝掩關
夜來風月好悔不宿香山
詩酒琴人例多薄命予酷好三事雅當此科
而所得已多爲幸斯甚偶成狂詠聊寫愧
懷

愛琴愛酒愛詩客多賤多窮多苦辛
中散步兵終不貴孟郊張籍過於貧一之已
嘆關於命三者何堪併在身只合飄零隨
草木誰教凌勵出風塵榮名厚祿二千石
樂飲閒遊三十春可得無厭時咄咄猶言
薄命不如人

寄明州于駙馬使君三絕句

有花有酒有笙歌其奈難逢親故何
近海饒風春足

雨白鬚太守悶時多

二

平陽音樂隨都尉留滯三年在浙東
吳越聲邪無法用莫教偷入管絃中

三

何郎小妓歌喉好嚴老呼爲一串珠

嚴尚書與于駙馬詩云莫損歌喉一串珠
海味腥鹹損聲氣聽看猶得斷腸無

閒臥

薄食當齋戒散班同隱淪佛容爲弟子
天許作閒人唯置牀臨水都無物近身
清風散髮卧不要紗巾

春早秋初因時卽事兼寄浙東李侍郎

春早秋初晝夜長可憐天氣好年光
和風細動簾帷

暖清露微凝枕簟涼窓下曉眠初減被池邊晚坐
移床閒從蕙草侵堦綠靜任槐花滿地苦理曲管絃
聞後院熨衣燈火映深房四時新景何人別遙憶多
情李侍郎

新秋喜涼

過得炎蒸月尤宜老病身衣裳朝不潤枕簟夜相親
樓月纖纖早波風嫋嫋新光陰與時節先感是詩人

初夏閒吟兼呈韋賓客

孟夏清和月東都閒散官體中無病痛眼下未飢寒
世事聞常悶交游見即歡杯觴留客切妓樂取人寬
雪髮隨身老雲心著處安此中殊有味試說向君看

哭崔二十四常侍

崔好酒放歌忘懷生死
知疾不起自為誌文

貂冠

重門馬鬣新封四尺墳薤露歌詞非白

雪旌銘官爵是浮雲伯倫每置隨身錢元亮先爲自
祭文莫道高風無繼者一千

有崔君

奉酬侍中夏中雨後遊城南庄見示八韻

島對間林巒雲收雨氣殘四山嵐色重五月水聲寒
老鶴兩三隻新篁千萬竿化成天竺寺移得子陵灘
心覺閒彌貴身緣健更歡帝將風后待人作謝公看
角里年雖老高陽興未闌佳辰不見召爭免趁杯盤

來詩云何
處趁杯盤

送兗州崔大夫駙馬赴鎮

戚里誇爲賢駙馬儒家認作好詩人魯侯不得辜風
景沂水年年有暮春

少年問

少年怪我問如何何事朝朝醉復歌號作樂天應不
錯憂愁時少樂時多

問少年

千首詩堆青玉案十分酒寫白金盃迴頭却問諸年
少作箇狂夫得了無

代琵琶弟子謝女師曹供奉寄新調弄譜

琵琶師在九重城忽得書來喜且驚一紙展看非舊
譜四絃翻出是新聲蕤賓掩抑嬌多怨散水玲瓏峭
更清珠顆淚霑金捍撥紅粧弟子不勝情終實散水皆新調名

代林園戲贈

裴侍中新修集賢字成池館甚盛數往遊宴醉歸自戲耳

南院今秋遊宴少西坊近日往來頻假如宰相池亭

好作客何如作主人

戲荅林園

豈獨西坊來往頻偷閒處處作遊人衡門雖是棲遲
地不可終朝鎖老身

重戲贈

集賢池館從他盛履道林亭勿自輕往往歸來嫌窄
小年年為主莫無情

重戲荅

小水低亭自可親大池高館不關身林園莫妬裴家
好憎故憐新豈是人

早秋登天宮寺閣贈諸客

天宮閣上醉蕭辰絲管閒聽酒慢巡為向涼風清景

道今朝屬我兩三人

曉上天津橋間望偶逢盧郎中張負外攜酒
同傾

上陽宮裏曉鐘後天津橋頭殘月前空闊境疑非下
界飄飄身侶在寥天星河隱映初生日樓閣葱籠半
出烟此處相逢傾一盞始知地上有神仙

八月十五日夜同諸客翫月

月好共傳唯此夜境閒皆道是東都嵩山表裡千重
雪洛水高低兩顆珠清景難逢宜愛惜白頭相勸強
歡娛誠知亦有來年會保得晴明強健無

對晚開夜合花贈皇甫郎中

移晚校一月花遲過半年紅開杪秋日翠合欲昏天

白露滴未死涼風吹更鮮後時誰肯顧唯我與君

醉遊平泉

狂歌箕踞酒樽前眼不看人面向天洛客最閒唯有
我一年四度到平泉

題贈平泉韋徵君拾遺

箕穎千年後唯君得古風位留丹陛上身入白雲中
躁靜心相背高低跡不同籠鷄與梁鷲不信有冥鴻
蕭皇甫郎中對菊花見憶

愛菊高人吟逸韻悲秋病客感衰懷黃花助興方攜
酒紅葉添愁正滿階居士葷腥今已斷仙郎杯杓爲
誰排愧君相憶東籬下擬廢重陽一日齋
夜宴醉後留獻裴侍中

九燭臺前十二姝主人留醉任歡娛翩翩舞袖雙飛
蛛宛轉歌聲一索珠坐久欲醒還酩酊夜深初散又
踟躕南山賓客東山妓此會人間曾有無

和韋庶子遠坊赴宴未夜先歸之作兼呈裴

負外負外亦愛先逃歸

促席留歡日未曛遠坊歸思已紛紛無妨按轡行乘
月何必逃杯走似雲銀燭忽拋楊柳曲金鞍潛送石
榴裙到時常晚歸時早笑樂三分校一分

集賢池荅侍中問

主人晚入皇城宿問客徘徊何所須池月幸閒無用

今宵能借客遊無

楊柳枝二十韻楊柳枝洛下新聲也洛之小妓有善歌之者詞章音韻聽

可動人故賦之

小妓攜

葉新歌蹋柳枝粧成剪燭後醉起拂衫時

繡履嬌行緩花筵笑上遲身輕委迴雪羅薄透凝脂

笙引簧頻煖箏催柱數移樂童翻怨調才子與妍詞

便想人如對先將髮比絲風條搖兩帶烟葉貼雙眉

口動櫻桃破鬟低翡翠垂枝柔畧嫋娜蕙嫩手葳蕤

喉鶴晴呼侶哀猿夜叫兒玉敲音歷歷珠貫字纍纍

袖爲收聲點釵因赴節遺重重遍頭別一一拍心知

塞北愁攀折江南苦別離黃遮金谷嶰綠映杏園池

春惜芳華好秋憐顏色衰取來歌裏唱勝向笛中吹

曲罷那能別情多不自持纏頭無別物一首斷腸詩

荅皇甫十郎中秋深酒熟見憶

烟景冷蒼茫秋深夜夜霜爲思池上酌先覺甕頭香
未暇傾巾漉還應染指嘗醍醐慙氣味琥珀讓晶光
若許陪歌席須容散道場月終齋戒畢猶及菊花黃

老去

老去愧妻兒冬來有勸詞煖寒從飲酒衝冷少吟詩
戰勝心還壯齋勤體校羸由來世間法損益合相隨

送宗實上人遊江南

忽辭洛下緣何事擬向江南住幾時每過渡頭傷問
法無妨菩薩是船師

和同州楊侍郎誇柘枝見寄

細吟馮翊使君詩憶作餘杭太守時君有一般輸我
事柘枝看校十年遲

冬初酒熟二首

霜繁脆庭柳風利剪池荷月色晴彌苦鳥聲寒更多
秋懷久寥落冬計又如何一甕新醅酒萍浮春水波

二

酒熟無來客因成獨酌謠人間老黃綺地上散松喬
忽忽醒還醉悠悠暮復朝殘年多少在盡付此中銷

送姚杭州赴任因思舊游二首

與君細話杭州事爲我留心莫等閒閭里固宜勤撫
恤樓臺亦要數躋攀笙歌縹緲虛空裏風月依稀夢
想間且喜詩人重管領遙飛一盞賀江山

二

渺渺錢塘路幾千想君到後事依然靜逢竺寺猿偷

橋間看蘇家女採蓮故妓數人憑問訊新詩兩首倩
留傳舍人雖健無多興老校當時八九年枕呼人

寄李相公

漸老只謀歡雖貧不要官唯求造化力試為駐春看
冬日平泉路晚歸

山路難行日易斜烟村霜對欲棲鷓鴣夜歸不到應聞
事熱飲三杯即是家

利仁比街作

草色斑斑春雨晴利仁坊北面西行踟躕立馬緣何
事認得張家歌吹聲

洛陽堰間行

洛陽堰上新晴日長夏門前欲暮春遇酒卽沽逢對

歌七年此地作閒人

過永寧

村杏野桃繁似雪行人不醉為誰開賴逢山縣盧明
府引我花前勸一杯

往年稠桑曾喪白馬題詩廳壁今來尚存又

復感懷更題絕句

路傍埋骨蒿草合壁上題詩塵蘚生馬死七年猶悵
望自知無乃太多情

羅敷水

野店東頭花落處一條流水號羅敷芳魂艷骨知何
在春草茫茫墓亦無

路逢青州王大夫起鎮立馬贈別

大旆擁金羈書生得者稀何勞問官職豈不見光輝
赫赫人爭看翩翩馬欲飛不期前歲尹駐節語依依

前年春予爲河南尹王爲少尹

和楊同州寒食乾坑會後聞楊工部欲到知
予與工部有宿醒

夜飲歸常晚朝眠起更遲舉頭中酒後引手索茶時
拂枕青長袖欹簪白接籬宿醒無興味光是肺神知

和劉汝州酬待中見寄長句因書集賢坊勝
事戲而問之

洛川汝海封畿接履道集賢來往頻一復時程雖不

遠百餘步地更相親汝去洛程一宿履道集賢兩宅相去一百三十步朱門

苦宴多投轄青眼留歡任吐茵聞道郡齋還有酒風

前月下對何人

池上二絕

山僧對碁坐局上竹陰清映竹無人見時聞下子聲

二

小娃撐小艇偷採白蓮迴不解藏踪跡浮萍一道開

白羽扇

素是自然色圓因裁製功颯如松起籟飄似鶴翻空
盛夏不銷雪終年無盡風引秋生手裏藏月入懷中
麈尾斑非疋蒲葵陋不同何人稱相對清瘦白鬚翁

五月齋戒罷宴徹樂聞韋賓客皇甫郎中飲
會亦稀又知欲携酒饌出齋先以長句呈

謝

妓房匣鏡滿紅埃酒庫封瓶生綠苔居士亦時緣護
戒車公何事亦停杯散齋香火今朝散開素盤筵後
日開隨意往還君莫怪坐禪僧去飲徒來

閒園獨賞

因夢得所寄蜂鶴之
詠因成此篇以和之

午後郊園靜晴來景物新雨添山氣色風借水精神
永日若爲度獨遊何所親仙禽狎君子芳藪倚佳人
蟻鬪王爭肉蝸移舍逐身蛛雙知仇儷蜂分見君臣
蠢蠕形雖小逍遙性卽均不知鵬與鷄相去幾微塵

種柳三詠

白頭種松桂早晚見成林不及栽楊柳明年便有陰
春風爲催促副取老人心

二

從君種楊柳夾水意如何准擬三年後青絲拂綠波
仍教小樓上對唱柳枝歌

三

更想五年後千千條翹塵路傍深映月樓上闇藏春
愁殺閒遊客聞歌不見人

偶吟

好官病免曾三度散地歸休已七年老自退閒非世
弃貧蒙強健是天憐韋荆南去留春服王侍中來乞
酒錢便得一年生計足與君美食復甘眠

池上卽事

移牀避日依松竹解帶當風挂薜蘿鈿砌池心綠蘋
含粉開花面白蓮多久陰新霽宜絲管苦熱初涼入

綺羅家醞瓶空人客絕今宵爭柰月明何

南塘暝興

水色昏猶白霞光暗漸無風荷搖破扇波月動連珠
蟋蟀啼相應鴛鴦宿不孤小僮頻報夜歸步尚踟躕

小宅

小宅里間接踈籬雞犬通渠分南巷水窓借北家風
庾信園殊小陶潛屋不豐何勞問寬窄寬窄在心中

諭親友

適情處處皆安樂大抵園林勝市朝煩鬧榮華猶易
過優閒福祿更難銷自憐老大宜踈散却被交親嘆
寂寥終日相逢不相見兩心相去一何遙

龍門送別皇甫澤州赴任韋山人南遊

隼旟歸洛知何日鶴駕還嵩莫過去惆悵香山雲水
冷明朝便是獨遊人

劉蘇州寄釀酒糯米李浙東寄楊柳枝舞衫

偶因嘗酒試衫輒成長句寄謝之

柳枝謾踏試雙袖桑落初香嘗一杯金昏醅濃吳米
釀銀泥衫穩越娃裁舞時已覺愁眉展醉後仍教笑
口開慙愧故人憐寂寞三千里外寄歡來

詔授同州刺史病不赴任因詠所懷

同州慵不去此意復誰知誠愛俸錢厚其如身力衰
可憐病判案何似醉吟詩勞逸懸相遠行藏決不疑
徒煩人勸諫只合自尋思白髮來無限青山去有期
野心惟怕鬧家口莫愁飢賣却新昌宅聊充送老資

寄楊六侍郎時楊初授戶部

西戶最榮君好去左馮雖穩我慵來秋風一筋鱸魚
膾張翰搖頭喚不迴

韋七自太子賓客再除秘書監以長句賀而

錢之韋往年嘗與

離筵莫愴且同歡共賀新恩拜舊官屈就商山伴麋
鹿好歸芸閣狎鴛鴦落星石上蒼苔古畫鶴廳前白
露寒老監姓名題在壁相思試為拂塵看

酒熟憶皇甫十

新酒此時熟故人何日來自從金谷別不見玉山頽
踈索柳花盈寂寞荷葉杯今冬問氈帳雪裏為誰開

九年十一月二十一日感事而作其日獨遊香山寺

禍福茫茫不可期大都早退似先知當君白首同歸
日是我青山獨往時顧索素琴應不暇憶牽黃犬定
難追麒麟作脯龍為醢何似泥中曳尾龜

卽事重題

重裘暖帽寬氈履小閣低窓深地爐身穩心安眠未
起西京朝士得知無

將歸渭村先寄舍弟

一年年覺此身衰一日日知前事非詠月嘲風先要
減登山臨水亦宜稀子平嫁娶貧中畢元亮田園醉
裏歸為報阿連寒食下與君釀酒掃柴扉
看嵩洛有歎

今日看嵩洛迴頭歎世間榮華急如水憂患大於山

見苦方知樂經忙始愛閒未聞籠裏鳥飛出月飛還
詠懷

隨緣逐處便安閒不入朝廷不住山心似虛舟浮水
上身同宿鳥寄林間尚平婚嫁了無累馮翊符章封
却還時阿羅初嫁及處歸分貧家殘活計正如身後莫
相關

詠老贈夢得

與君俱老也自問老何如眼澁夜先臥頭慵朝未梳
有時扶杖出盡日閉門居懶照新磨鏡休看小字書
情於故人重跡共少年疎唯是閒談興相逢尚有餘

白氏文集卷第三十二

白氏文集卷第三十三

律詩凡一首

從同州刺史改授太子少傅分司

承華東署三分務履道西池七過春歌酒優遊聊卒
歲園林瀟洒可終身留侯爵秩誠虛貴踈受生涯未
苦貧月俸百千官二品朝廷雇我作閒人張良踈受並為太子

奉和裴令公新成午橋庄綠野堂卽事

舊徑開桃李新池鑿鳳凰只添丞相閣不改午橋庄
遠處塵埃少閒中日月長青山爲外屏綠野是前堂
引水多隨勢栽松不趁行年華翫風景春事看農桑
花如謝家妓蘭偷荀令香遊絲飄酒席瀑布濺琴床

巢許終身穩蕭曹到老忙千年落公便進退處中央
時裴加中書令

自題小草亭

新結一茅茨規模儉且卑土階全壘塊山木半留皮
陰合連藤架藜香近菊籬壁宜藜杖倚門稱荻簾坐
窓裏風清夜簷間月好時留連嘗酒客勾引坐禪師
伴宿雙棲鶴扶行一侍兒綠醅量盞飲紅稻約升炊
齷齪豪家笑酸寒富屋欺陶廬閒自愛顏巷陋誰知
蝼蟻謀深穴鷦鷯占小枝各隨其分足焉用有餘爲

自詠

細故隨緣盡形衰具體微闔閭僧尚鬧較瘦鶴猶肥
老遣寬裁襪寒教厚絮衣馬從銜草輟雞任啄籠飛

只要天和在無令物性違自餘君莫問何是復何非
新亭病後獨坐招李侍郎公坐

新亭未有客竟日獨何爲趁暖泥茶竈防寒夾竹籬
頭風初定後眼暗欲明時淺把三分酒閒題數句詩
應須置兩榻一榻待公坐

閒臥寄劉同州

軟褥短屏風昏昏醉臥翁鼻香茶熟後膏暖日陽中
伴老琴長在迎春酒不空可憐閒氣味唯欠與君同
殘酌晚食

閒傾殘酒後爇擁小爐時舞看新翻曲歌聽自作詞
魚香肥潑火飯細滑流匙除却慵饒外其餘盡不知
喜見劉同州夢得

紫綬白髭鬚同年二老夫論心共牢落見面且歡娛
酒好携來不詩多記得無應須爲春草五馬少踟躕

裴令公席上贈別夢得

年老官高多別離轉難相見轉難思雪銷酒盡梁王
起便是鄒枚分散時

尋春題諸家園林

聞健朝朝出乘春處處尋天供間日月人借好園林
漸以狂爲態都無悶到心平生身得所未省似而今

又題一絕

貌隨年老欲何如興遇春牽尚有餘遙見人家花便
入不論貴賤與親疎

家園三絕

滄浪峽水子陵灘路遠江深欲去難何侶家池通小
院臥房階下插魚竿

二

籬下先生時得醉甕間吏部暫偷閒何如家醞雙魚
榼雪夜花時長在前

三

鴛鴦怕捉竟難親鸚鵡雖籠不著人何侶家禽雙白
鶴閒行一步亦隨身

老來生計

老來生計君看取白日遊行夜醉吟陶令有田唯種
黍鄧家無子不留金人間榮耀因緣淺林下幽閒氣
味深煩慮漸銷虛白長一年心勝一年心

早春題少室東巘

三十六峰晴雪銷嵐氣生月留三夜宿春引四山行
遠草初含色寒禽未變聲東巘最高石唯我有題名

早春卽事

眼重朝眠足頭輕宿酒醒陽光滿前戶雪水半中庭
物變隨天氣春生逐地形北簷梅晚白東岍柳先青
葱攏抽羊角松巢墮鶴翎老來詩更拙吟罷少人聽
歎春風兼贈李二十侍郎二絕

對根雪盡催花發池岍冰消放草生唯有鬚霜依舊
白春風於我獨無情

二

道場齋戒今初畢酒伴歡娛久不同不把一杯來勸

我無情亦得似春風

春來頻與李二賓客郭外同遊因贈長句

風光引步酒開顏送老消春嵩洛間朝踏落花相伴
出暮隨飛鳥一時還我爲病叟誠宜退君是才臣豈
合閒可惜濟時心力在放教臨水復登山

二月二日

二月二日新雨晴草芽菜甲一時生輕衫細馬春年
少十字津頭一字行

春和令公綠野堂種花

綠野堂開占物華路人指道令公家令公桃李滿天
下何用堂前更種花

清明日登老君閣望洛城贈韓道士

風光烟火清明日歌哭悲歡城市間何事不隨東洛
水誰家又葬北邙山中橋車馬長無已下渡舟航亦
不問塚墓纍纍人擾擾遼東悵望鶴飛還

三月三日

畫堂三月初三日絮撲窓紗鷺拂簷蓮子數杯嘗冷
酒柘枝一曲試春衫階臨池面勝看鏡戶映花蓂當
下簾指點樓南翫新月玉鈎素手兩纖纖

雨中聽琴者彈別鶴操

雙鶴分離一何苦連陰雨夜不堪聞莫教遷客孀妻
聽嗟嘆悲啼訛殺君

酬鄭二司錄與李大郎中寒食日相過同宴

見贈二人並
是同年

偶因冷節會嘉賓况是平生心所親迎接須矜踈傳
老祇供莫笑阮家貧杯盤狼藉宜親夜風景闌珊欲
過春相對喜歡還悵望同年只有此三人

喜與楊六侍御同宿

听憤靜言明月夜匡牀閒臥落花朝二三月裏饒春
睡七八年來不早朝濁水清塵難會合高鵬低鷄各
逍遙眼看又上青雲去更卜同衾一兩窟

殘春詠懷贈楊慕巢侍郎

位逾三品日太子少傅年過六旬時予今年六十五不道官

班下其如筋力衰猶憐好風景轉重舊親知少壯難
重得歡娛且強爲興來池上酌醉出袖中詩靜話開
襟久閒吟放盞遲落花無限雪殘髮幾多絲莫說傷

心事春翁易酒悲

閒居春靜

閒泊池舟靜掩扉老身慵出客來稀
愁應暮雨留教住春被殘鷺喚遣歸
揭甕偷嘗新熟酒開箱試著舊
生衣冬裘夏葛相催促巫老光陰速
侶飛

春盡日天津橋醉吟偶呈李尹侍郎

宿雨洗天津無泥未有塵初晴迎早夏
落照送殘春興發詩隨口狂來酒寄身
水邊行鬼峩橋上立逡巡疎傳心情老
吳公政化新三川徒有主風景屬閒人

池上逐涼二首

青苔地上消殘暑綠剗陰間逐晚涼
輕屐單衣薄紗帽淺池平岼痺藤床
簪纓怪我情何薄泉石諳君味

甚長徧問交親爲老計多言宜靜不宜忙

二

總問睡足休高枕水畔閒來上小舩
棹遣禿頭奴子撥茶教纖手侍兒煎
門前便是紅塵地林外無非赤日天
誰信好風清簟上更無一事但條然

香山避暑二絕

六月灘聲如猛雨香山樓北暢師房
夜深起凭闌干立滿耳潺湲滿面涼

二

紗巾草履竹疎衣晚下香山蹋翠微
一路涼風十八里臥乘籃輿睡中歸

老夫

七八年來遊洛都三分遊伴二分無風前月下花園
裏處處唯殘个老夫世事勞心非富貴人生實事是
歡娛誰能逐我來閒坐時共酣歌傾一壺

香山下卜居

老須為老計老計在抽簪山下初投足人間久息心
亂藤遮石壁絕澗護雲林若要深藏處無如此處深
無長物

莫訝家居窄無嫌活計貧只緣無長物始得作閒人
青竹單床篔簹烏紗獨幅巾其餘皆稱是亦足奉吾身

宿香山寺酬廣陵牛相公見寄

來詩云唯羨東都白居士

月明香積問禪師時牛相三衣乞退有詔不許

手札八行詩一篇無由相見但依然君匡聖主方行

道我事空王正坐禪支許徒思遊白月夔龍未放下

青天應須且為蒼生住猶去懸車十四年牛相公於

以詩代書寄戶部楊侍郎勸買東鄰王家宅

勸君買取東鄰宅與我衡門相並開雲映嵩峰當戶

牖月和伊水入池臺林園亦要聞間置筋力應須及

健迴莫學因循白賓客欲年六十始歸來

贈談客

上客清談何豐豐幽人間思自寥寥請君休說長安

事膝上風清琴正調

初入香山院對月

大和六年秋作

老住香山初到夜秋逢白月正圓時從今便是家山

月試問清光知不知

題龍門堰西澗

東岼菊蕞西岼柳柳陰烟合菊花開一條秋水琉璃
色闊狹纔容小舫迴除却悠悠白少傳何人解入此
中來

秋霖中奉裴令公見招早出赴會馬上先寄

六韻

雨暗三秋日泥深一尺時老人平旦出自問欲何之
不是尋醫藥非干送別離素書傳好語絳帳赴佳期
續借桃花馬催迎楊柳姬只愁張錄事罰我怪來遲
嘗酒聽歌招客

一甕香醪新插筍雙鬟小妓薄能謳管絃漸好新教
得羅綺雖貧免外求世上貪忙不覺苦人間除醉即

須愁不知此事君知否君若知時從我遊

八月三日夜作

露白月微明天涼景物清草頭珠顆冷樓角玉鈎生
氣爽衣裳健風疎砧杵鳴夜衾香有思秋簟冷無情
夢短眠頻覺宵長起暫行燭凝臨曉影重怨欲寒聲
槿老花先盡蓮凋子始成四時無了日何用嘆衰榮

病中贈南鄰覓酒

頭痛牙疼三日卧
看煎藥婢來扶今朝似校擡頭
語先問南鄰有酒無

曉眠後寄楊戶部

軟綾腰褥薄綿被涼冷秋天穩暖身一覺曉眠殊有
味無因寄與早朝人

秋雨夜眠

涼冷三秋夜安閒一老翁卧遲燈滅後睡美雨聲中
灰宿温瓶火香添暖被籠曉晴寒未起霜葉滿階紅
喜夢得自馮翊歸洛兼呈令公

上客新從左輔迴高陽興助洛陽才已將四海聲名
去又占三春風景來甲子等頭憐共老文章敵手莫
相猜鄒枚未用爭詩酒且飲梁王賀喜杯

齋戒滿夜戲招夢得

紗籠燈下道場前白日持齋夜坐禪無復更思身外
事未能全盡世間緣明朝又擬親杯酒今夕先聞理
管絃方丈若能來問疾不妨兼有散花天

和令公問劉賓客歸來稱意無之作

水南秋一半風景未蕭條皂蓋迴沙苑藍輦上洛橋
閒嘗黃菊酒醉唱紫芝謠稱意那勞問請錢不早朝
翫夢得窮秋夜坐卽事見寄

焰細燈將盡聲遙漏正長老人秋向火小女夜縫裳
菊悴籬經雨萍銷水得霜今冬暖寒酒先擬共君嘗
偶於維陽牛相公處覓得箏箏未到先寄詩

來走筆戲荅

來詩云但愁封寄
去魔物或驚禪

楚匠饒巧思秦箏多好音如能惠一面何啻直雙金
玉柱調須品朱絃染要深會教魔女弄不動是禪心
荅夢得秋庭獨坐見贈

林梢隱映夕陽殘庭際蕭疎夜氣寒霜草欲枯虫思
急風枝未定鳥棲難容衰見鏡同惆悵身健逢杯且

喜歡應是天教相煖熱一時坐老與閒官

長齋月滿携酒先與夢得對酌醉中同赴令

公之宴戲贈夢得

齋公前日滿三旬酒榼今朝一拂塵乘興還同訪戴
客解醒仍對姓劉人病心湯沃寒灰活老面花生朽
木春若怕平原怪先醉知君未慣吐車茵

奉寫淮南牛相公思黯見寄二十四韻每對

分叙
兩意

白老忘機客牛公濟世賢鷗棲心戀水鵬舉翅摩天

累就優閒秩連操造化權貧司甚瀟灑榮路自喧闐

望苑三千日台階十五年是人皆弃忘何物不陶甄

居易三任官寮皆分司東都于茲八載
思黯出入外內九年皆同平章事藍輦遊嵩嶺

油幢鎮海壖竹篙撐釣艇金甲擁樓船雪夜尋僧舍

春朝列妓筵長齋儼香火密宴簇花鈿自覺閒勝鬧

遙知醉笑禪是非分未定會合杳無緣我正思楊府

君應望洛川西來風嫋嫋南去鴈連連日落龍門外

潮生瓜步前秋同一時盡月共兩鄉圓舊眷交歡在

新文氣調全慙無白雪曲難荅碧雲篇金谷詩誰賞

蕪城賦衆傳珠應晒魚目鈿未伏龍泉遠許驚魔物

深情寄酒錢霜紉一百疋玉柱十三絃思黯遠寄筆
來先寄詩云

但愁封寄去魔物或
驚禪仍與酒資同至楚醞來樽裏秦箏送耳邊何時

紅燭下相對一陶然

吳祕監每有美酒獨酌獨醉但蒙詩報不以

飲招輒此戲寫兼呈夢得

蓬山仙客下烟霄對酒唯吟獨酌謠不怕道狂揮玉

爵記去飲玉亦曾乘興換金貂吳監前任君稱名士

誇能飲王孝伯云但常無事讀我是愚天可見招獨

子不招夫頗有伯倫為醉伴何愁不解傲松喬

鬲夢得霜夜對月見懷

淒清冬夜景悵落長年情月帶新霜色碓和遠鴈聲
暖憐爐火近寒覺被衣輕枕上鬲佳句詩成夢不成

初冬月夜得皇甫澤州手札并詩數篇因遣

報書偶題長句

清冷玉韻兩三章落箔銀鈎七八行心逐報書懸鴈
足夢尋來路遶羊腸水南地空多明月山北天寒足
早霜道所居在水南澤最恨潑醅新熟酒迎冬不

得共君嘗

雪中酒熟欲携訪吳監先寄此詩

新雪對新酒憶同傾一杯自然須訪戴不必待延枚

雪賦云陳榻無辭解袁門莫懶開笙歌與談笑隨事

自將來

鬲令公雪中見贈訝不與夢得同相訪

雪似鷺毛飛散亂人披鶴氅立徘徊鄒生枚叟非無
興唯待梁王召即來

題酒甕呈夢得

若無清酒兩三甕爭向白鬚千萬莖麴蘖銷愁真得
力光陰催老苦無情凌烟閣上功無分伏火爐中藥
未成更擬共君何處去且來同作醉先生

迂叟

一辭魏闕就商賓散地間居八九春初時被目為迂
叟近日蒙呼作隱人冷暖俗情諳世路是非間論任
交親應須繩墨機關外安置踈愚鈍滯身

洛一問居寄山南令狐相公

已收身向園林下猶寄名於祿仕間不鍛嵇康彌懶
靜無金踈傳更貧間支分門內餘生計謝絕朝中舊
往還唯是相君忘未得時思漢水夢巴山

惜春贈李尹

春色有時盡公門終日忙雨衙但不闕一醉亦何妨
芳對花團雪衰翁髮撲霜知君倚年少未苦惜風光
對酒勸令公開春遊宴

時泰歲豐無事日功成名遂自由身前頭更有忘憂
日向上應無快活人自去年來多事故從今日去少
交親宜須數數謀歡會好作開成第二春

與夢得偶同到敦詩宅感而題壁

山東纔副蒼生願漢書云山東出相川上俄驚逝水波履道
淒涼新宅第敦詩宅在履道宣城零落舊笙歌崔家妓樂多婦
宣州也園荒唯有薪堪採門冷兼無雀可羅今日相逢
偶同到傷心不是故經過

楊六尚書新授東川節度使代妻戲賀兄嫂

二絕

劉綱與婦共升仙弄玉隨夫亦上天何似沙哥領崔
嫂碧油幢引向東川

二
金花銀枕饒君用，罨畫羅衣盡婢裁。覓得黔婁為妹，婿可能空寄蜀茶來。

間遊卽事

郊野遊行熟，村園次第過。驀山尋浥澗，踏水渡伊河。寒食青青草，春風瑟瑟波。逢人共杯酒，隨馬有笙歌。勝事經非少，芳辰過亦多。還須自知分，不老擬如何。

六十六

七十欠四歲，此生那足論。每因悲物故，還且喜身存。安得頭長黑，爭教眼不昏。交游成拱木，婢僕見曾孫。瘦覺腰金重，衰憐髮雪繁。將何理老病，應付與空門。
池上早春卽事招夢得

老更驚年改，閒先覺日長。晴熏榆莢黑，春染柳梢黃。雲破山呈色，冰融水放光。低平穩舫舫，輕暖好衣裳。白角三升榼，紅茵六尺牀。偶遊難得伴，獨醉不成狂。我有中心樂，君無外事忙。經過莫慵懶，相去兩三坊。因夢得題公坐所寄蠟燭，因寄公坐。

照梁初日光，相似出水新。蓮艷不如却，寄兩條君領。取明年雙引入中書。辛相入朝舉雙蠟餘官各一

令公南庄花柳正盛，欲偷一賞，先寄二篇。

最憶樓花千萬朵，偏憐隄柳兩三株。擬提社酒攜村奴，擅入朱門莫怪無。映樓桃花拂堤坐柳庄上最勝絕處故舉以為對

二
可惜亭臺間度日，欲偷風景暫遊春。只愁花裏鶯鶯饒。

舌飛入宮城報主人

春夜宴席上戲贈裴淄州

九十不衰真地仙謂淄州也六旬猶健亦天憐謂予自今年

相遇鶯花月此夜同歡歌酒筵四座齊聲和絲竹兩

家隨分鬪金鈿留君到曉無他意圖向君前作少年

贈夢得

年顏老少與君同眼未全昏耳未聾放醉臥為春日

伴趁歡行入少年叢尋花借馬煩川守弄水偷船惱

令公聞道洛城人盡怪呼為劉白二狂翁

晚春欲携酒尋沈四著作先以六韻寄之

病容衰慘澹芳景晚蹉跎無計留春得爭能柰老何

篇章慵報荅杯讌喜經過願我酒狂久負君詩債多

多醉竟未醒荅今故云爾敢辭携綠蟻只願見青蛾

最憶陽關唱真珠一串歌沈有詔者善唱西

開成二年三月三日河南尹李待價以人和

歲稔將禊於洛濱前一日啓留守裴令公

令公明日召太子少傅白居易太子賓客

蕭籍李仍叔劉禹錫前中書舍人鄭居中

國子司業裴輝河南少尹李道樞倉部郎

中崔晉司封員外郎張可續駕部員外郎

盧言虞郎員外郎苗愔和州刺史裴儔淄

州刺史裴檢校禮部員外郎楊魯士四

門博士談弘摹等一十五人合宴于舟申

由斗亭歷魏堤抵津橋登臨沂公自晨及

暮簪組交映歌笑間發前水嬉而後妓樂
左筆硯而右壺觴望之若仙觀者如堵盡
風光之賓極遊泛之娛美景良辰賞心樂
事盡得於今日矣若不記謂洛無人晉
公首賦一章鏗然玉振顧謂四座繼而和
之居易舉酒抽毫奉十二韻以獻座上

三月草萋萋黃鶯歇又啼柳橋晴有絮沙路潤無泥
襖事修初畢遊人到欲齊金鈿耀桃李絲管駭鳧鷖
轉岫迴船尾臨流簇馬蹄開於揚子渡踏破魏玉堤
妓接謝公宴詩陪荀令題舟同李膺汎醴爲穆生攜
水引春心蕩花牽醉眼迷塵街從鼓動烟樹任鴉棲
舞急紅靨疑歌遲翠黛低夜歸何用燭新月鳳樓西

同夢得寄賀東西川二楊尚書

龍節對持真可愛鴈行相接更堪誇兩川風景同三
月千里江山屬一家魯衛定知連氣色潘楊亦覺有
光華予與二公皆忝姻戚應憐洛下分司伴冷宴閒遊老看花

喜小樓西新柳抽條

一行弱柳前年種數尺柔條今日新漸欲拂他騎馬
客未多遮得上樓人須教碧玉羞眉黛莫與紅桃作
麴塵爲報金堤千萬剗饒伊未敢苦爭春

酒醒尋夢得

料合同惆悵花殘酒亦殘醉心忘老易醒眼別春難
獨出雖慵懶相逢定喜懽還攜小蠻去試覓老劉看

小蠻酒
榼名也

感事

服氣崔常侍叔晦燒丹鄭舍人中居常期生羽翼那忽化
灰塵每遇淒涼事還思潦倒身唯知趁杯酒不解鍊
金銀睡適三尸性慵安五藏神無憂亦無喜六十六
年春

和裴令公南庄一絕

裴云野人不識中書令喚作陶家與謝家

陶廬僻陋那堪比謝墅幽微不足攀何侶嵩峯三十
六長隨申甫作家山

宅西有流水墻下構小樓臨翫之時頗有幽

趣因命歌酒聊以自娛獨醉獨吟偶題五

絕

伊水分來不自由無人解愛為誰流家家拋向墻根

底唯我栽蓮越小樓

二

水色波文何所侶麴塵羅帶一條斜莫言羅帶春無
主自置樓來屬白家

三

日灩水光搖素壁風飄對影拂朱欄皆言此處宜絃
管試奏霓裳一曲看

四

霓裳試罷唱梁州紅袖斜翻翠黛愁應是遙聞勝近
聽行人欲過盡迴頭

五

獨醉還須得歌舞自娛何必要親賓當時一部清商

樂亦不長將樂外人

偶作

監界出即忘歸舍柴戶昏猶未掩關聞客病時慙體
健見人忙處覺心閒清涼秋寺行香火和煖春城拜
表還木鴈一篇須記取致身才與不才間

同夢得寫牛相公初到洛中小飲見贈時午

辭罷揚州節度
就拜東都留守

淮南揮手拋紅旆洛下迴頭向白雲政事堂中老丞
相制科場裏舊將軍宮城烟月饒全占關塞風光請
半分詩酒放狂猶得在莫欺白叟與劉君

幽居早秋間詠

幽僻翳塵外清涼水木間卧風秋掃簟步月夜開關

且得身安泰從他世險難但爭要路不必必入深小
軒鶴留何用泉魚放不還誰人知此味臨老十年閒
和令狐僕射小飲聽阮咸

掩抑復淒清非琴不是箏還彈樂府曲別占阮家名
古調何人識初聞滿座驚落盤珠歷歷搖珮玉琤琤
侶勸杯中物如含林下情時移音律改豈是昔時聲
燒藥不成命酒獨醉

白髮逢秋王丹砂見火空不能留姹女爭免作衰翁
賴有杯中綠能為面上紅少年心不遠只在半酣中

送盧郎中赴河東裴令公墓

別時暮雨洛橋嘶到日涼風汾水波荀令見君應問
我為言秋草閉門多

送李滁州

君於覺路深留意我亦禪門薄致功未悟病時須去
病已知空後莫依空白衣臥疾嵩山下皂蓋行春楚
水東誰道三年千里別兩心同在道場中

長齋月滿寄思黯


一日不見如三月一月相思如七年侶隔山河千里
地仍當風雨九秋天明朝齋滿相尋去挈榼抱衾同
醉眠

冬夜對酒寄皇甫十

霜殺中庭草冰生後院池有風空動樹無葉可辭枝
十月苦長夜百年強半時新開一瓶酒那得不相思
歲除夜對酒

衰翁歲除夜對酒思悠然草白經霜地雲黃欲雪天
醉依香枕坐慵傍暖爐眠洛下閒來久明朝是十年

白氏文集卷第三十三



卷之三

七

